

vixam, cao di X, et sier Pollo Da Mulla, inquisitor. Et cussi questa matina fono in camera, et *etiam* poi disnar, a darli corda.

Da poi disnar, fu gran-conseio. Fu fato podestà a Brexa sier Lorenzo Zustignam, fo cao dil conseio di X, *quondam* sier Bernardo, cavalier, procurator; a Bergamo, podestà sier Stefano Contarini, fo podestà a Chioza, *quondam* sier Bernardo; et capetanio a Vicenza, niun non passò.

Da poi fo pregadi. Non fo il principe. Et fo conseio di X con zonta di colegio, et poi rimase semplice, nè niuna parte im pregadi fo messa.

*Da Crema, dil podestà, di 19.* Come ha letere di domino Nicolò da cha' da Mosto. Li scrive esser partito da Novara, a di 17 la matina, e haver visto in quella hora la compagnia di monsignor di Leni con certi albanesi, li qualli volevano levar il signor Lodovico di castello per condurlo in Franza, e non lo volse veder partir, per non haver tempo. Poi vene a Milan, e trovò che poco avanti missier Zuan Jacomo era zonto in Milan, e, avanti dismantasse, ando a far reverentia al cardinal Roam, poi andò a caxa, e fece congregar il populo in corte, e, presente esso cardinal, e monsignor de Lixom, e quelli del parlamento de Milan, con molti altri signori francesi, *omnibus presentibus*, domino Michiel Toso, doctor milanese, in nome dil populo de Milano, fece una oration vulgar, la conclusion di la qual fu questa: *Quod fatebatur delictum, et petebat veniam, nomine populi.* Et rechiedete la remissione di ducati 200 milia, promessi al re per el populo preditto; li altri 92 100 milia prometeva pagarli fra zorni octo; li altri 50 milia de qui a chalende. Poi, rechiedete la remissione de li officij, *quod restitueretur pristince dignitati. Tertio, quod provideretur ne amplius rebelles et facinorosi homines, rebellionis auctores una cum domino Ascanio, haberent potestatem et facultatem concitare tumultus in populo.* Quarto, che *solum* fusse puniti li auctori de la rebellione, et se perdonasse al resto. Quinto, che le zente d'arme se levasse dal paese, che più non molestasse el duchato de Milano. Respondete a tutte queste parte domino Michiel Rizo, neapolitano, dil parlamento di Milano, homo di grande ingegno, e con tale elegantia disse, che meglio non si porebe pensare, laudando el signor missier Zuan Jacomo *usque ad astra*, per el suo bon governo e prudentia. La conclusion del suo parlare fu questa: che 'l si perdonava a' milanexi, exceptuando li capi et auctori di la rebelione; ad altre parte non fece risposta. *Ultimo* fu fato comandamento *quod deponerentur arma*, per parte del car-

dinal predicto. Et facto fine al parlare, milanexi che haveano aparechiato una bella processione de puti et pute, de etate de anni 7 *vel* zireha, quali *cum ramis palmarum* e con la ymagine dil Crucefixo, tuti cantavano *alta voce*: *Domine, miserere nostri*; parte cridava: Franza! Franza! *Item*, par che Milano stia assa' quieto, e ogniuno desidera ripossare *etc.*

*Da Trevi, da li proveditori, di 19.* Nulla da conto. Mandano una letera dil cardinal Roam, di 18, da Milan, sotoserita: *Cardinal di Ambosa*; per la qual domanda li rebelli milanesi *etc.* *Item*, di quel Zuan Maria Palavesim li fo ricomandà per li proveditori, risponde: vederà li soi meriti. *Item*, avisa, le comunità di sguizari averli dimandà Belinzona *etc.*

*Da Bergamo, di rectori, di 19.* Manda in nota li presoni milanesi sono li per numero 24, e à ricevuto nostre letere, ma non risponde a quelle.

*Questi sono preconi è in Bergamo.*

*Primo in rocha.*

Domino Batista Visconte, cavalier, de età de anni 50.

Domino Gaspar Visconte, cavalier, de età de anni 45.

Domino Ambrosio dal Mayno, cavalier, de anni 35.

Domino Hironimo Da Charehano, doctor, de anni . . .

*In citadella.*

El conte Bortholamio Crivello, de età de anni 60.

Domino Antonio Maria Crivello, suo fiol, de età de anni 28.

El preposito de San Cassam, de anni 45.

Domino Francesco da Marian, cugnato dil conte Bortolo, de anni 55.

Domino Guarnier da Castiom, de anni 38.

Domino Zuam Francesco Visconte, de anni 28.

El preposito de Ogni Santi di Cremona, de anni 25.

Domino Marco Antonio Palavisino, fiol di missier Orlando, di anni 22.

*Item*, tre fradelli, Antonio, Carlo et Paulo, cremonesi, cognominati de . . .

*Pur in citadella altri cittadini.*

Domino Vicenzo Porro, de anni 38.

Domino Hironimo de Lampugnano, de anni 12.